



REPUBLIKAN'I MADAGASIKARA
Fivavaha - Tanindrazana - Fanandroana

FIADIDIANA NY REPOBLIKA

**TATITRY NY FILANKEVITRY NY MINISITRA NATAO
NY ASABOTSY 30 MAY 2020**

**I- FANDANIANA DIDIM-PANJAKANA SY VOLAVOLAN-
DALÀNA:**

Taorian'ny fakan_kevitra nataon'ny Praiminisitra lehiben'ny Governemanta araka ny fahefana nomen'ny Filoham-pirenena azy, tamin'ireo Filohana Andrimpanjakana 3 eto amin'ny firenena : ny Filohan'ny Antenimieram-pirenena, ny filohan'ny Antenimieran-doholona ary ny Filohan'ny Fitsarana avo momba ny lalàm-panorenana, dia nandray izao didim-panjakana manaraka izao :

Mipetraka eto amin'ny tanin'ny Repoblikan'i Madagasikara ny « FAHAMEHANA ARA-PAHASALAMANA » (état d'urgence sanitaire) manomboka androany 30 May 2020 ary mihatra avy hatrany.

Toy izao ny didim-panjakana laharana faha 2020-592 tamin'ny 30 May 2020 noraisina:



FIADIDIANA NY REPOBLIKA

DIDIM-PANJAKANA LAHARANA faha-2020-592 tamin'ny 30 may 2020

MANAMBARA AMPAHIBEMASO NY FAHAMEHANA ARA-PAHASALAMANA MANERANA NY TANIN'NY REPOBLIKA

NY FILOHAM-PIRENENA,

Araka ny lalàm-panorenana, ao amin'ny andininy faha 61;

Araka ny lalàna faha 91-011 tamin'ny 18 jolay 1991 mahakasika ny Vanim-potoana manokana

Araky ny lalàna laharana faha 2011-002 tamin'ny 15 jolay 2011 mikasika ny fifehezana ny fahasalamam-bahoaka ;

Araka ny didim-panjakana laharana faha 2019-1407 tamin'ny 19 jolay 2019 manendry ny Praiminisitra, lehiben'ny Governemanta;

Araka ny didim-panjakana laharana faha-2020-070 tamin'ny 29 janoary 2020 nanendry ny mpiakambana ao amin'ny governemanta;

Araka ny didim-panjakana laharana faha 2020-359 tamin'ny 21 marsa 2020 milaza ny manambara ampahibemaso ny fahamehana ara-pahasalamana manerana ny tanin'ny Repoblika.

Araka ny didim-panjakana laharana faha 2020 - 370 tamin'ny 04 Aprily 2020 milaza sy manambara ampahibemaso ny fahamehana ara-pahasalamana manerana ny tanin'ny repoblika.

Araka ny didim-panjakana laharana faha faha 2020-420 tamin'ny 17 Aprily 2020 milaza sy manambara ampahibemaso ny fahamehana ara-pahasalamana manerana ny tanin'ny repoblika.

Araka ny didim-panjakana laharana faha faha 2020-457 tamin'ny 02 May 2020 milaza sy manambara ampahibemaso ny fahamehana ara-pahasalamana manerana ny tanin'ny repoblika.

Araka ny didim-panjakana laharana faha faha 2020-483 tamin'ny 16 May 2020 milaza sy manambara ampahibemaso ny fahamehana ara-pahasalamana manerana ny tanin'ny repoblika.

Nandritra ny Filankevitry ny Minisitra taorian'ny fakan-kevitra natao tamin'ny Filohan'ny Antenimieram-pirenena, ny filohan'ny Antenimieran-doholona ary ny Filohan'ny Fitsarana avo momba ny lalàm-panorenana;

DIA MAMOAKA IZAO DIDIM-PANJAKANA MANARAKA IZAO :

ANDININY VOALOHANY.- mitohy mandritra ny 15 andro eto amin'ny tanin'ny Repoblikan'i Madagasikara, manomboka amin'ny fotoana hivoahan'ity didim-panjakana ity ny « Fahamehana ara-pahasalamana » noho ny antony ara-pahasalamana, nohon'ny fisian'ny toe-javatra goavana mampisahotaka ny fiainam-bahoaka, mba hampizotra ara-dàlana ny asan'ireo fahefam-panjakana araka ny didim-panjakana laharana faha 2020-359 tamin'ny 21 martsa 2020 sy laharana faha 2020-370 tamin'ny 04 Aprily 2020 sy ny laharana faha 2020-420 tamin'ny 17 Aprily 2020, ny laharana faha 2020-457 tamin'ny 02 May 2020 ary ny laharana faha -483 tamin'ny 16 May 2020 voalaza etsy ambony.

ANDININY FAHAROA.- Ity didim-panjakana ity dia mitarika ny fampiharana ireo fepetra rehetra voafaritry ny fehezandàlana mahakasika ny Vanim-potoana Manokana (situation d'exception) mametra ny atao hoe Fahamehana.

ANDININY FAHATELO.- Ho fampiharana ny andininy faha 18 ao amin'ny lalana faha 91-011 tamin'ny 18 jolay 1991 mikasika ny Vanim-potoana Manokana, izay mamaritra ny fahefan'ny Filoham-pirenena amin'ny fampiharana ny fanaraha-maso ny fivezivezen'ny olona sy ny fiara, ny fanaraha-maso ny famatsiana rehetra ary ny fanarahamaso ny fitaovam-piadiana dia natolotra ny Praiminisitra ny fanatanterahana izany.

ANDININY FAHA - EFATRA.- Ny Minisitry ny fiarovam-pirenena, ny Minisitry ny Fitsarana, ny Minisitry ny toe-karena sy ny fitantanam-bola, ny Minisitry ny ati-tany sy ny fitsinjaram-pahefana, ny Minisitry ny Fahasalamambahoaka, ny Minisitry ny Filaminam-bahoaka, ny Minisitry ny Paositra ny fampiroboroboana ny haitao ara-kajy mirindra, ny Minisitry ny Serasera sy ny Kolontsaina, ny Sekreteram-panjakana misahana ny Zandarimaria eo ambany fiahian'ny minisiteran'ny fiarovam-pirenena no miantoka ny fanatanterahana izao didim-panjakana izao.

ANDININY FAHA-DIMY.- Noho ny hamehana ary ho fampiharana ny voalazan'ny andininy faha-6 ao anatin'ny didy hitsivolana laharana faha-62-041 tamin'ny 19 septambra 1962 momba ny fepetra ankapoben'ny lalàna anatin'ny sy ny lalàna iraisam-pirenena mifehy ny fifandraisana manokan'ny samy olona, ity didim-panjakana ity dia manan-kery avy hatrany raha vantany vao havoaka amin'ny onjampeo sy/na ny fahitalavitra, ary izany dia tsy miankina amin'ny famoahana azy amin'ny gazetim-panjakan'ny Repoblika.

Antananarivo faha- 30 May 2020

Ny Filohampirenena

Andry RAJOELINA

Ny Praiminisitra lehiben'ny Governemanta

NTSAY CHRISTIAN

Natao androany faha 30 May 2020

**Ny sampan-draharahan'ny serasera sy ny fifandraisana eo anivon'ny
Fiadidiana ny Repoblika**